

بِسْمِ اللَّهِ الرَّحْمَنِ الرَّحِيمِ

# أوبريت سودانية

الشريف زين العابدين الهندي

الإهداء  
إلى المكمان  
والزمنان  
والإنسان

الشريف زين العابدين  
الهندي

هذه أوبريت سودانية .. أنشودة الهجرة والإغتراب .. أغنية حب  
وتصدٍ وعرفان ، حذاء الذين خرجوا من أوطانهم فالتصقت  
بأرواحهم ووجدانهم وظلت تتفتح صوراً يعيشونها بأعماقهم  
.. ترطب لهم هجير الغربة وتحدو لهم ركب العودة الحثيث .. إنها  
ليست من تأليف أحد إنما هي مشاعر قوم وموال أمة .. إنها  
ليست غناء .. إنما هي عزفٌ هادئٌ رزين علي أوتار الحقيقة  
.. إنها ليست ذكريات إنما هي دفق حي لواقع ملموس معاش  
مستمر إنها ليست رثاء إنما هي ملحمة الحماس اللاهب  
لإنطلاق الشباب المغذي بحكمة الشيوخ إنها عروة وثقي تشدّ  
أهلها برباط محكم متين فلا يتحطمون للمحن وإنما يحطمونها ولا  
يتراجعون للعقبات وإنما يجتازونها ولا يضعفون للصعاب وإنما

يطوعونها ..إنهم جيلٌ ضُربَ له موعدٌ ثانٍ مع القدر وتعيّن له  
لقاءٌ جديدٌ مع التاريخ والحريّة ..إنهم جيل البطولات وجيل  
التضحيات وجيل الفداء ..إنها من تأليفهم جميعاً ومن أدائهم  
جميعاً في عزفٍ موقّعٍ من سيمفونية الخلود مع أوركسترا الحق  
والصدق في مهرجان الشروق الجديد بعد ليّهم الطويل الويل .

مساهر ليلك الطّول نجومو هجوع  
وغرقان قمرو في جوّه السحاب مصروع  
بصارع فيك ضلام تمّن سنيّو سبوع  
وأراقب فجرك الآذن زمانو سطوع

\* \* \* \* \*

وشايلك سيف نصر لا يطيش ولاهو بزوع  
ورابطك في حشاي من العطش والجوع  
وأسقيك مني دم ودموع  
وأوقد لك جحيم وشموع

\* \* \* \* \*

وأقش منك دموع الضيم علي خدودك بتتحدّر  
وأقبل فيك جبين مرفوع كراية النصر

وبيرق عزّه رفرق في ركاب فاتحين  
وأغسل لك تراب الهجره بالإيدين  
وأجيك المجد مدخورلك سنين ودنين  
ومن حبوبتك الوقفت تردّ الدين  
وتطرد حملة الباشا ومع الغازين  
حلّيله مهيره كاسرة التوب وحدّ الزين

\* \* \* \* \*

ومن جدّك بيكبر فوق جبل سرغام  
ودافن ضهرو في كرري ومتكتل ركاب ولجام  
وسال في إيدو سيف العود يبيعج بيهو كبده وهام  
وقبّال دمو مايرشح مع البارود يكون شتت عليك أجسام

\* \* \* \* \*

أجسام من غزاة ماقدروا يسبوك  
ولا كشفولك المقنع ولا في الشينه ختوك  
ولا خلولك أحداقهم ولا هم قدروا يدنوك  
وملم فلقوا لي هسه بجوروا رضاكي ويطروك

\* \* \* \* \*

وكيف ينساك وذكراك لي دماهو عروق  
ومما الهجـره حلت ليهو لابسك إنتي عَمَّه وطوق  
وعايشـك جوّه وجدانو مُعايشة الحنين لي الشوق  
وممزوج فيك مـمازجة اللسان لي الضوق

\* \* \* \* \*

بيشوفك في عيون النيل وفي الأطفـال  
وفي تاريخك الأخضر علي الأجيال  
وفي بحر الدمـي اللسع بجم سيال  
وفي مستقبلاً واعد كبار وعـيال

\* \* \* \* \*

بيشوفك بشـري فيك شقق جبال ورمال  
وفي حدقاتو مـفتوحات تلاته ليال  
بترسم لي طريق نجم العشا الولوال  
وتكشف فيكي أسراراً كتار وأهوال

\* \* \* \* \*

وليقـاك حتي في رمش الغريب الضال  
مهمـوم في اليمن لا الحامدي لا السلال

ويلاقـيك في الخليج مشـوره حالـك حال  
وثـيكل فيـك يـبـعوك بي الذهب والمال

\* \* \* \* \*

فلذاتك مبعثره في البلاد مأجوره  
تـبـني علي الرمال أحلاما ثم قصورا  
خـلـوك سايبه في إيـمـه الطغاة مأسوره  
شـان ما يـسـلموك الحلبي روب في كوره

\* \* \* \* \*

أبشـري نـحن لسـع في الخـلا مرابطين  
ونـحن عقاب عـهـود أنصار مع مهاجرين  
ونـحن سـهاري ما بنـعرف غـمضـة العين  
ونـحن فـداك نـزود عنـك بـقالنا سنين

\* \* \* \* \*

حالفين بيـك قـسم غالي وعزيز ويمين  
مانضـوق راحـه لا نشوف زوجه لا والدين  
ولا نـدفن رؤوسنا علي الرمال خـايـفين  
حتي نوقـي من أشـلانا أعلامك علي القصرين

وحتي نسوي لي الق-صفوك مقبرتين  
زي ما صنعا تلترا علي الألف ألفين  
وحتي نكسرّ الدد وينقسم نصين  
ويكون عيدنا الكبير في مقرر النيلين  
وما بينساك عشان يطراك في الأزمان  
قريب منك قرابة الحدقه لي الإنسان  
وجايل فيك جولة الدم علي الوردان  
وقيمتك عندو زي قيمتك معاهو زمان  
بيعيشك هضبه بتشارف تلال قيسان  
ويحياك مويه في دارفور تبل عطشان  
ويحييكم فيك من سنّار ترع خزان  
ويتدفق خيرو بي عند الرهد بستان  
ويقول لي الدندر الغاضب كفاك جيشان  
ويسهرلي وليداتك يعشّي الحاري والجميعان

\* \* \* \* \*

منو الزيّك ولد وإستالد الأولاد ؟  
منو الزيّك بجيهم ديمه عشره أنداد ؟

منو الزيّك ببيز الدنيا مويه وزاد ؟  
منو الزيّك ضروع وزروع ونيل مداد؟  
منو الزيّك بطانه وغابه دون حداد؟  
منو الزيّك سهول وادي وجبال أوتاد ؟  
منو الزيّك أصل موروث من الأجداد؟  
منو الزيّك جراتق دم قُدام وجداد؟  
قشي الدمعه يا بت الرجال ما بيحكموك أولاد!

\* \* \* \* \*

بت الحُرّ وأم الحُرّ وأخت الحُرّ  
وست الضنبو مردوم بي وراهو بجر  
ست الفي الحُشش من العصير بنتر  
ست الخيل وست الفي القلوب بنقر  
وأم الحلفو بيك وبّي العذاب المبر  
ما بختولك الشينه ومناحة كُرّ

\* \* \* \* \*

أولادك فضلة الموت وبتلجوبو  
ودايماً سيرتو في لسانهم وبتسلوبو

وزرعك من زمان المهدي طارح دوبو  
واحدین بیحصدوا وواحدین بفکوا دروبو

\* \* \* \* \*

تیلادك مسكر فی الخزن مجوس  
هجليج وإندراب ومهوقني وأبنوس  
ومن صمغ الهشاب سوي السنط ترتوس  
ومن شدر التبلدي المويه كوس فی كوس

\* \* \* \* \*

ومن ضلّ النخيل الشمس دايره تكوس  
ومن حرب المطر طبع الحراز مدروس  
ومن شوك السيدر جيش السلم هكسوس  
ومن زهر التبرّ الباديه باقيه عروس

\* \* \* \* \*

وبي توب البرم سوي الطلح ملبوس  
ومن شدر الأراك عطر الدعاش مبثوث  
ومن سيف العشر جيش هكس صار مهروس  
والدوم واج بقیف الأتبراوي خروس

\* \* \* \* \*

فيك الفيل وفيك العنزه والجاموس  
وفيك التيتل اللّيات قرونو تروس  
وفيك الأصله والدابي أب درق وجروس  
وفيك أسد العرين رب العراك والدوس  
وفيك ريل الودى البي نالو راتع يجوس  
وفيك فهود وفيك نمور وفيك طاووس  
وفيك صقر الكواهله العينو كالفانوس  
وفي نيلك عُشاري يشيل من الجاقوس

\* \* \* \* \*

فيك الأزرق البي عرفو هدّ القيف  
وفيك الأبيض الماش منطرح ما بقيف  
وفيك رهد المفازه الوعدو ما خليف  
وفيك الأتبراوي اللي الشواطي مخيف

\* \* \* \* \*

وفيك الدندر البهجم هجمة السيف  
وفيك الباسلام في الفشقه عامل هيف

وفيك سيتيت منبت من قناهو صريف  
وفيك القاش بوري الرعده والصاقعه الدوادو كيف  
وفيك بحر الجبل حاقب عُري الرجاف  
وفيك ببحر الغزال والجور وبحر زراف  
وفيك سوبات ملولو زي ديباً خاف  
وفيك بحر العرب مليان نعام وزراف

\* \* \* \* \*

وفيك بحيره قال نو سيده ما الأسلاف  
وفيك خور أب حبل شاقى البلد كشاف  
وفيك تمت العظيم شايل الكلتي والشاف  
وفيك خور الذهب ذو الذكرى والأعراف  
وعندك مقرناً حَرَّم سواك ما انشاف

\* \* \* \* \*

وفيك ملوال غرس رمحو وتكلبو كراعو  
وفيك شبل النوير في نيلو مدّ شراعو  
وفيك رث الشلك حلاً المشبك باعو  
لبس العاج سوار غطاهو هزّ ضراعو

\* \* \* \* \*

وعندك ألف خور في الوادي وألفين رافد

وحسبان الجزاير والجروف ما وارد

والنبرو الحبيب لي عودو سيدو يقالد

والساقية الحنين توريقا باكي وساهد

\* \* \* \* \*

والبلدات ونجاضات حليلة فايد

وسمسم وأم صقور وسهل قبوب ود زايد

وصقيعة أم بليل براقا قايم وقاعد

والمطر البكب أربع شهور ويدارد

\* \* \* \* \*

وفيك قدنبليه وكمبو سته الوارد

وأم سينات تغازل دوكة ماشه تحادد

الكفاي بقول لي الفشقه بهمك شارد

كونو الفاو بقت ترع وجناين وموارد

\* \* \* \* \*

في غروبك ربوع خصبه وتبر مب هول

ووديان من عقيق مغسوله مطر وسيول  
وكتبان تابه بتطرّر حواشي سهول  
تجود بي الكركدي وصمغ الهشاب والفلول  
وتدي القنقليس طول الشهور والحول  
وفيك حفرة نحاس وأبو تولو غير مصقول  
والعيش والسماسم والصمغ والكول  
والتور والخروف والناقه والكاتول  
علي دينار كسب ليها الشرف والطول  
أبو زكريا أَدَاب العصاة زول زول  
من ودّاي بيكرت في ربوعها ويجول  
لي الكفره وصحاريها العجاف الهول

\* \* \* \* \*

وجبل مرّه الشمخ جايب مناخ لبنان  
وفجّر من ينايعو العجاب بستان  
طارح عنبو والزيتون مع الرمان  
وجاب من يافا تفاحاً كبار ومُكَّان

\* \* \* \* \*

ومن مليط مكربت شاقى دار الريح  
نازل باراً أم فتنه بتسر وتريح  
وإتياسر علي التياره صوتها بصيح  
ونؤخ تقلي في السهل الكبير وفسيح

\* \* \* \* \*

ومن تقلي ام برم شایل جبال النوبه  
عامر قلبو بي برشم عريس الحوبه  
جلجال والإحيمر نارهم يتدفوبا  
وين مجذوب وشامبي الحاره بتسلوبا

\* \* \* \* \*

وفي شروكك ربي العناني قاطع تيهو  
في ضهرو الدغم دوباى حرارتو وتيهو  
وفي الشبريه راكبه حمامه بتغنيهو  
مسدار أب شوارب ياخدو ويوديھو

\* \* \* \* \*

أمانه عليك بطانة أب سن بتنسي الكاعه ؟  
يوم أكلت كُباد ساكت رخم وضباعه

يوم محمود وناس عوض الكريم سمساعه  
واقفين في الشمس دايرين يغطوا شعاعه  
في ضحوة عجاج وسيوفهم اللماعه  
ياكلن في التراقي ويقطّعن في ضراعهم

\* \* \* \* \*

ياالمعزوزه بي دمانا وعضام أبواتنا  
عارفك مقريفه لي شراب قهواتنا  
زغرتي يا ام شيوم خلّي الندق نحساتنا  
ونحاسب فيك عقب في الجاتنا والماجاتنا

\* \* \* \* \*

هسع قومي سوّي السيره جُريّ الح  
خلينا النهشّك فيك ونملاك دم  
ندفن لك شقوقك شور عضام ولحم  
ندفق لك نحيراً لا وقف لا جم  
نشبع فيك صقور وضباع وطيوررخم  
لا من ترضي كيفك ودور هَناك ينتم

\* \* \* \* \*

شوفي معزتك كيفن عزيزه علينا  
وشوفي عزمنا لي الحمل الوقف راجينا  
شوفينا بنتُر ولا بنكف الشينه  
شوفينا بندكك ولا ماهامينا  
شوفينا بنبشر فيك طوال إيدينا  
ولّا نغطي بي الطين والعجين إضينا

\* \* \* \* \*

وفي شروقك ارض مليانه خير ومعادن  
فيها السارح الناشق وفيها الساكن  
وفيها المن حلايب جايي غاشي سواكن  
وفيها الأركويت نسّام أراك وجناين  
وفيها غزال جبّيت وقلّ قصاد الشادن  
ومن صمد إنطرح لي أربعات بيعاين

\* \* \* \* \*

وناس أوشيك يحنّقوا في الربليه ويغنوا  
وأوهاج سلاّ شوتالو وبركلو يستو  
تمباك الدّمك جوه الكدوس حاشنو

جبنات يابنات هرّيو قامن وجنّو  
دبايو أوجات كيها يا أدروب أبوك كيفنو  
رّوح تندلاي ولا الصُّهْب فاتنو  
قالوا الليله هبباي برّكه زايد جنّو  
ناس باكاش وحامد في اروما إستنو  
\* \* \* \* \*

الكور دّلّو والموربيت بتمشي الوادي  
حُتّ الدرقه والمهاري السنين بي غادي  
وأذني الإنقلّت قرّب علينا ينادي  
والهوشاب برّذ بروي الغليل لي الصادي  
\* \* \* \* \*

في حلفا التقيت بالأوس وأولاد نافع  
سلام أولاد ركاب أول بناء للجامع  
درب الخزرج الضّوا العتامير ساطع  
لي بري المحس في توتي ليهو مشارع  
\* \* \* \* \*

وفي شمالك نخيل باسق يداعب الريح  
بقول لي البركل الشامخ كفاك تبريح  
إت عارف كلامي ورأيي بالتلميح  
جيب رأياً قديم بيهو بتفيد وتريح  
قش دمع السواقي البي العذاب بتنيح  
وإطري العضام تحتك تَنِينُ وتصيح

\* \* \* \* \*

شوف النيل مكوَّع شايل أولاد شايق  
راقصبو النسيم طربان مصفي ورايق  
شاقي الباوقه لي مروي وكريمه يعانق  
يكرف في دعاشاً بوح جروف وحدايق

\* \* \* \* \*

سلام ياخالي كيف أمسيت في جناتك  
وفي روعة فراديسك وطيب نسمااتك  
دارك عامره مفتوحه وضيوفك جاتك  
هاشي وباشي يندّي عطاك بي راحتك

\* \* \* \* \*

عتمور أب حمد قطع الوهاد والصي  
حارساك بي حزام صنعو الكريم الحي  
دفن في بطنو أسرارو وطواهن طي  
لما يجيها بي الحامد اب كهارب وضي

\* \* \* \* \*

أولاد جابر السووا الكتاب نبراس  
عمروا الجو تلاوه وغرقولا الساس  
نشروا الكون مصاحف وعلموها الناس  
سلام ياشيخ حمد أسد العرين والباس  
سلام درع البلد ليهم بقيت متراس  
سلام نور العلم تقابه في كدباس

\* \* \* \* \*

قول حاس دور واقيف زنهار  
ورجّع لي الزمن بي الشوكه والشنكار  
أنفث زي لهيب الشهدا باستنفار  
وشيل تعظيم سلام بلد الحديد والنار  
يوم الشهدا بي دماهم لووكي حكار

وعزّوك بالنفوس لامن بقت تذكّار  
(أنا سوداني) ورواها العطرأوي شعار

\* \* \* \* \*

مر بي الدامر البي ذكرو عزّ وجلّ  
وإتنوّخ فسيح وأدّي المجاذيب طلّه  
شوف النار متلعبه في المساجد ولاّ  
مات نور الضيا وجات بعدو نار الجله  
شوف المصحف الأربع قرون بتدلّا  
ماسك وردو أم سحرته عين خلق الله ؟

\* \* \* \* \*

سلام يا الملك نمر أَدّاب الترك في شندی  
سلام أولاد جعل أهل المكارم عندي  
أهل الدروع والخيل الكلهم جرقندي  
ولادعبدالله فيك هازين صوارم الهندي

\* \* \* \* \*

إتطري السناجك وواقعة الخشخان  
وإتطري النحاس وكتين يزّم بطران

ونادي أولاد جعل والنجمجم القرمان  
والخيل عركسن وإتروغن ريقان  
وصقر الجو بيحلّق في السما جيعان  
يالكدّك بدور كبده وكلي ومصران

\* \* \* \* \*

نادي الملك نمر معلّم أبة الضيم  
شاوي الباشا شي خلاّي جناهو يتيم  
ودفتردار بحك عند المتمه زميم  
أرفع صوت لعلّ الناسي يقي فهميم  
أرفع صوت خلاص شرطنا شرب الهيم  
وكاد عاقلنا يصبح من سكاتو بهيم

\* \* \* \* \*

حبابك عشره يا بت مقرن النيلين  
حبابك يا أم عجن بعد العدّيل والزّين  
حبابك يا المحكّره في المشاعر والفؤاد والعين  
حبابك يا المغسّله بي طهور مويّتين

\* \* \* \* \*

حباب أهلك بيلاعبو الموج مع البردين  
حبابهم كتفوا أبو طليح علي اللقنين  
حباب قصرك ضبح غردون من الإضنين  
حباب الخندق العجن الجلود بي الطين

\* \* \* \* \*

حباب المهدي فيك كبر حراره ودين  
حباب اسد العرين عبدالله ود تورشني  
حباب النور عقيد الخيل عقود الشين  
عنقرة المعزّه الأصلو ما بتلني  
حباب الزاكي أداب النقر في الحين  
حباب ود النجومى القبرو في نقشكين  
حباب عثمان سواكن دقنه في الدورين  
حباب يعقوب حباب محمود وشيخ الدين  
سلام يا البقعه مبروكه الإله والدين  
حباب الحرّوك لا إنتماء لا دين  
حباب السودنوك خلوك سماره وزين  
حباب الأزهرى النكس ذري العلمين

حباب الرايه هفهافه وتكيل العين  
قولوا معاي تبارك أقول دقر يا عين

\* \* \* \* \*

وزغرتي يا أم رشوم قولي البطان وين ويين  
بركز لما سيطانهم تبید وتلين  
ولما يشوفوا قطع إيديا بالسكين  
ولما تقول حمامه كفاك دقر يا عين

\* \* \* \* \*

سلام يا القلعه بي بدورا وجواهر تاجا  
سلام يا أب عنجه خورك لاقا نيلو وناجا  
سلام يا أب روف وودنوباوي ضوّا سراجا  
سلام ديم أب سعد نار الخيم وجّاجا  
سلام الله أكبر في الفتح دجّاجا  
بي سيوفا ورماحا ولي الحمد سجّاجا  
بحر أبيض فتح أبوابا وقت الحاجه  
زي موسي عدّي لا تعب لا حاجه  
كلك أدباء من عشاق وفنانين

شالوك في عيونهم وصوروك تلويحي  
وشاشوبك شعر مطبوع جزيل ورصين  
فيهو أم در وفيهو الأسكله وستين  
\* \* \* \* \*

وعازه الفي هواك نحن الجبال ثابتين  
ويا فلق الصباح قول لي نهارك وين  
ونرعاك في الفؤاد بي عناية الحارسي  
وياكروان كرومه خليل فرح ما بلين  
\* \* \* \* \*

ويا ود الرضي القلبو إنقطع نصين  
تري العبادي ماسك الدابي بي الايدين  
وود الريح الشارك عتيق حبلين  
داك الأمى والمسّاح عريس أم زين  
مع أبو صلاح ونور الكهربائي الزين  
وفيك الحاج سرور غني الفراق لي متين  
وما عارف المفارق قدمو ماش لي وين  
ويا عازه الفراق طال بي وكلو حنين

مطروحت الجبين من سوبا لي ستر  
نيليك من غرامهم لبسوك سوار  
أكنافك موطأه فيها ماء وخضار  
ولي عزاز القبائل صرتي أحسن دار

\* \* \* \* \*

محصولك ذهب ما بكيو بي العبّار  
مواسمك عده محسوبات طوال وكتار  
أرضك في الجمال محسوبه بي الأشبار  
مشكّله بي التراب لكين لجين ونضار

\* \* \* \* \*

ترعك زي بحار لبنان طوال وعُدال  
وأب عشرين يفوق ناس بردي في الأمثال  
لياليك بي القمر رويانه نور وظلال  
مطرزه بي النجوم في إحتفال وجمال

\* \* \* \* \*

قرآنك بزيم من كنتي إنت بلاد  
تقاقبك تضوي الليل زناد في زناد

ما شقّاك ضلال إلا إنشبح وإنحاد  
وما جال فيك ظلوم إلا إنكبح وإنقاد

\* \* \* \* \*

عزّك من قديم محسوب جدد وأحفاد  
عمروك الرجال تيلاد قصاد تيلاد  
زرعوك بي السلاليك ومنجل الحصاد  
جرنك في التقى تمتم قرافه وزاد

\* \* \* \* \*

مبسوطه ومحكّره لا هُبُّك لا تَبُوبُ  
وقطنك زي لتيب الحقنه خاتي عيوب  
معلاق منتني ولوزاً عَفِي ومكروب  
وتيلتو طويله زي خيط الحرير في التوب

\* \* \* \* \*

دواوينك مفتحه لي الضيوف مفروشه  
وحالّك مجنّدره لا وسخ لا كوشه  
شاربه الهمبريب بي الساريات مرشوشه  
والعجب الأماسي تقول ليالي الروشه

في مدني الكبير نشأت لك الحيشه  
فجّرتي المواهب ومنبع الوطنيه  
بذره مقدّسه إترّبت علي الحريه  
من المؤتمر لي الليله ناميه قويّه

\* \* \* \* \*

من يومك كسبتي الكاس وشلتي الرايه  
وأفكار المحافل باقيه ليهم تايه  
بي التعليم سقوك وشبّعوك قرايه  
وأدوك من شبابهم كل حب ورعايه  
حليل قلب الجزيره المستقيد النابض  
حليل جمعة رجالها وجيل شبابها النابض  
حليل جمع السراة زي الهزبر الرابض  
كل واحد علي وطنيتو عاضي وقابض

\* \* \* \* \*

يا أم الزهور ما تسوّي قبض الريح  
كان رأيك زمان بيشفي وبفيد وبريح  
قشيلنا السواكب وأمسحي التبريح

فاتوك الرجال لسع جناك بصيح

\* \* \* \* \*

ما برضالك الخوف والضياع والحيره

ما برضالك اليوم تبقي إنتي أسيره

ما برضاك أكلتي الحلوه تنسي مريره

والتاريخ رهيب ما بينسي ليك تسطييره

\* \* \* \* \*

حاشاك الملامه وما بتسوّي العيب

وإيدك لسه تجدع من بعيد وتصيب

ويومك في المخلص شايفنو جايي قريب

ودورك بيتلعب قبل الشمس ما تغيب

\* \* \* \* \*

أكسري (المين ) كنار خلي الأراضى تعوم

سويهن بحر من ريبا لي الخرطوم

ولّعي في الفبارك غيظ ونار وسموم

خلي الهايفه تنقد والنصيحه تقوم

\* \* \* \* \*

سوّي الترعّه ساطر والمصارف كوم  
سلي سيوفك الجبّابه ما مثلوم  
أعقب سنجه طوف بي الدالي والمزموم  
روح لي القرايين والسماسم كوم  
شوف كرمك شرف قال لي الردوك ما تلوم  
أنسي الفاتت أيامك بجهن يوم

\* \* \* \* \*

أرفع ساعدك رَبِّكَ العظيم بتشوفا؟  
حيي أبا القديم وجديد بقت معروفه  
قول لي الشهداء نارنا متلعبه ومكلوفه  
لا ماتت ولا غمضوا البقيدوا ظروفوا

\* \* \* \* \*

أرجينا بنجيك موحددين صادقين  
شايلين المدافع وبي السما طاييرين  
صواريحنا بتشكّل تطرش الإضنين  
وفي الجاسر نقيف ليك بي النصر هازين

\* \* \* \* \*

دیل اولاد حشاك لا إرتزاق لا زيف  
ودیل الكلهم صندید وأصلو شریف  
دیل دخریك لی سنین الجفاف والحیف  
ودیل دفقة ینایبعك شهر الصیف

\* \* \* \* \*

دیل نیلك وكت قطع البرك والقیف  
ودیل دیم السواری الأصلو ما بتقیف  
دیل الرضعوأ حر لبنك بدون تحریف  
ودیل البقعوا فی نارك بدون تکلیف  
دیل إتبأشروبك إنتی درقه وسیف  
ودیل أخوان صدق فی الله دون تحریف  
ودیل یا أم عیونك وقلبك الولیف

\* \* \* \* \*

رووك والله بی دماهم بیقولك زاد  
وسوولك تلیداً کلو یوم یزدد  
دیل درع السنین العن عروضك زاد  
ودیل کوکاب بیسل أحشا عدوکی إن عاد

خايضين فيك صحاري تقيد لهيب وشرار  
وطالعين فيك جبال عاليات علي الطيَّار  
ونعرف أرضك المحبوبة بالأشبار  
وننزل في ربوعك لينا مليون دار  
وندخل فيك ضحي ونمرق مع الأسحار  
ما حجروك علينا حيارى أو أغرار

\* \* \* \* \*

نارك ما إنطفت من يوم رماك الغادر  
وسجنك ما فضي وأهلك عليهو تدافر  
ولي الموت كمبلو أولادك مغني وشاعر  
وكل عام ليك عيد بالدم موشح وظافر  
خلّي عدوك مجهجه في حكومتو وحابر  
وقيدك هسه بنكسرو ونجدلو ضفاير

\* \* \* \* \*

نحن أولادك العارفانا دون تذكّار  
ونحن الجينا في نسلك من الأبكار  
ونحن الليله شمّعك في الضلام سهّار

ونحن الفجر لي الليل كان قعد كان طار  
ونحن لنضري ورتابتو ونشيلأ عصار  
ونحن بلابل الحريه تصدح حتي في الأوكار  
\* \* \* \*

أقول فيك تاني يا ست الشرف والطول ؟  
وعزك في الأرض تريان فروع وأصول  
أرقي قفا بنجيك مهما زماننا يطول  
ومهما الدهر يردم في حملنا حمل  
ومهما نموت فداك نترامي زول في زول  
برضو منيعه إنتي علي القدر والصول  
\* \* \* \*

وإنتي كبيره أكبر من صغارة العسكر  
وإنتي عظيمه ما بيدلك سلاح البيقهر  
وإنتي قويه لا بتلين ولا بتكسر  
وإنتي أنوف أشم من ديلا ما بتعقر  
\* \* \* \*

قودي لنا رستنا وخلفي الأشتام  
وخنّقي لي دلاليك وصحّي النام  
أرقصي الفاشر الهضليمو كبّ ونام  
وقولي الليله شبالكم عليّ حرام

لَمَّا تَكْسَرُوا الْقَيْدَ أَبْ عَشْرَ أَعْوَامٍ  
وَلَمَّا تَقْنَعُوا الْكَاشِفَاتِ وَرَا وَقْدَامِ  
وَلَمَّا تَحْيِيُوا سَجَّانَكُمْ حَزِيٍّ وَمَنْضَامِ  
وَلَمَّا أَوْلَادِي يَبْقُوا جُنُودَ وَمَشْ خُدَّامِ

\* \* \* \* \*

هذي الأراجز يا أمـ\_\_\_\_اه من كبد السماء  
من حيث يتعب بالشموس الغـ\_\_\_\_ر سير  
الكبرياء

من حيث يحتصد الرصاص — دور كل الأبرياء  
من حيث يسخر بالمشانق إعــــــــــــــتاق  
الشرفاء

من حيث يعصف بالزلازل إحتشاد  
الأتقباء

من حيث تحتشد السجون جـ\_\_\_\_\_افلاً  
للاوفياء

من حيث يلتقط الرسل \_\_\_\_\_الة قلب كل  
الأنبياء

من حيث كل الكون حـ \_\_\_\_\_ق وسلام  
وضياء

من حيث ما كـ \_\_\_\_\_ذب الفؤاد ولا ألم به  
الرياء

من حيث ينبوع المحـ \_\_\_\_\_بة  
والجلالة والبهاء

من حيث لا بـ \_\_\_\_\_دء ولا ثـ \_\_\_\_\_م  
إنتـ \_\_\_\_\_هاء

إنها محـ \_\_\_\_\_ض خشـ \_\_\_\_\_وع و  
صلاة ودعاء

سوداء حالكة الثياب كأنها قد فصلت لتكون مثل إهابي  
حظي وإياها طريدي لعنة لم يشفها زهدى وحفظ كتابي  
وكأنها والدهر طوع بناها محن يطادرهن صوت عذاب  
وأنا اكفكف دمعها وجراحها واقود قافلة بغير صواب  
ما زال في الصحراء يقتلها الظمأ وتسوقها خدع لكل سراب  
حفيت مناسمها وبان هزالها وتجرعت غصصاً من الأوصاب  
ماضٍ حاديها وطار هزارها أبداً ولا خافت من الإرهاب  
لكنها تذوي ويسقط بعضها وتغالب التسيار والأتعاب  
وتقطع الأطراف يوهن عزمها وتنكر الأصحاب والأتراب

والخلف يحبس خطوها ويعيقه وتقاطع الآراء والألقاب  
هذا يكبلها وذاك يشدها والآخرون قواعد الأعتاب  
والواقفون علي السياج كأنهم خشب مسندة من الأخشاب  
والدار قفر من نواطير خلت ومن الخيول الغر والأصحاب  
ماذا من الأحشاء يولد في غدٍ غير الهجين المنكر الأنساب